



Komisija za vanjsku trgovinu i carine
Povjerenstvo za vanjsku trgovinu i carine
Broj:01/3 50-1-3-21/08
Sarajevo, 3. juni 2008. godine

Комисија за спољну трговину и царине

Z A P I S N I K

21. sjednice Komisije za vanjsku trgovinu i carine Predstavničkog doma Parlamentarne skupštine BiH, održane 3. 6. 2008. godine

Sjednica je počela u 13 sati.

Sjednicom je predsjedavala predsjedavajuća Komisije Snježana Rajilić.

Sjednici su prisustvovali članovi Komisije: Mehmed Suljkanović, Slavko Jovičić, Jozo Križanović, Šemsudin Mehmedović, Salko Sokolović, Hadži Jovan Mitrović, Jerko Ivanković Lijanović i Ekrem Ajanović.

Sjednici su, također, prisustvovali: Slobodan Puhalac, ministar vanjske trgovine i ekonomskih odnosa BiH, Dragiša Mekić, pomoćnik ministra vanjske trgovine i ekonomskih odnosa BiH, Seid Uzunović, šef Odsjeka za ruralni razvoj MVTEO BiH, Samira Sulejmanović, stručni saradnik u MVTEO BiH, Savo Marjanac, direktor Sektora privrede VTKBiH, Sead Jeleč i Beščo Alibegović iz Udruženja poljoprivrednika u BiH, Radomir Marjanović, stručni savjetnik, Sonja Abdulovski, stručni saradnik u Komisiji za vanjsku trgovinu i carine, Aida Kreho, viši stručni saradnik u Zakonodavno-pravnom sektoru Zajedničke službe Sekretarijata Parlamentarne skupštine BiH, i Emira Češljarić, sekretar Komisije za vanjsku trgovinu i carine.

Za sjednicu Komisije predložen je i jednoglasno usvojen sljedeći

D N E V N I R E D

1. Usvajanje zapisnika 19. i 20. sjednice Komisije,
2. Razmatranje Informacije Ministarstva vanjske trgovine i ekonomskih odnosa BiH o robnoj razmjeni Bosne i Hercegovine za prvi kvartal 2008. godine,
3. Upoznavanje o dopisu Udruženja poljoprivrednika u Bosni i Hercegovini, broj:01/3-50-3-587/08, od 14. 5.2008.,
4. Tekuća pitanja.

Ad.1. Usvajanje zapisnika 19. i 20. sjednice Komisije

Zapisnici 19. i 20. sjednice Komisije usvojeni su jednoglasno, bez primjedbi.

Ad. 2. Razmatranje Informacije Ministarstva vanjske trgovine i ekonomskih odnosa BiH o robnoj razmjeni Bosne i Hercegovine za prvi kvartal 2008. godine

Predsjedavajuća Komisije Snježana Rajilić obavijestila je prisutne da je Vijeće ministara Bosne i Hercegovine na 50. sjednici, održanoj 29.5. 2008., razmotrilo i usvojilo Informaciju o robnoj razmjeni Bosne i Hercegovine za prvi kvartal 2008. godine. Ministarstvo vanjske trgovine i ekonomskih odnosa BiH zaduženo je da Informaciju dostavi Komisiji za vanjsku trgovinu i carine Predstavničkog doma.

Slobodan Puhalc, ministar vanjske trgovine i ekonomskih odnosa BiH, upoznao je članove o navedenoj informaciji. Pojasnio je da je u prva tri mjeseca 2008. godine uvezeno robe u vrijednosti od 3.672.651.000 KM, odnosno uvoz je zabilježio rast od 27, 34% u odnosu na isti period 2007. godine. Ukupan izvoz iznosio je 1.566.943.000 KM i porastao je za 14,75%. Ukupan trgovinski deficit dostigao je iznos od 2.105.708.000 i on se povećao za 38,67%. Najbolja pokrivenost uvoza izvozom je sa Slovenijom 88,55%, sa Austrijom 74,75%, sa Italijom 67,71%, sa Srbijom 57,83%, sa Njemačkom 49,38% te sa Mađarskom 33,58%.

Istakao je da u BiH postoji dvije stotine firmi koje ocjenjuju usklađenost kvaliteta poljoprivrednih i industrijskih proizvoda i izdaju certifikate, a nisu funkcionalno povezane. Mišljenja je da bi se trebala preispitati data ovlaštenja certifikacionih kuća unutar entiteta i kantona. Također je potrebno razdvojiti ruralno i komercijalno i uključiti Direkciju za ekonomsko planiranje za dostavljanje određenih materijala.

Samira Sulejmanović, stručni saradnik u Ministarstvu vanjske trgovine i ekonomskih odnosa BiH, kroz tabelarni prikaz komentirala je strukturu bh. robne razmjene koja je koncentrirana na mali broj zemalja. Najznačajniji bh. vanjskotrgovinski partner je Evropska unija, zatim članice CEFTA-e, te ostatak svijeta.

Istakla je da Bosna i Hercegovina ima najveći deficit u sektoru žitarica; pića, alkoholnih pića i vode; ostalih mehaničkih proizvoda; proizvoda od šećera i kaka i proizvoda duhanske industrije. Polovinu ukupnog deficita čine poljoprivredni proizvodi.

Savo Marjanac, direktor Sektora privrede VTKBiH, rekao je da su prikazani podaci u Informaciji zajednički urađeni s MVTEOBiH. U pogledu strukture izvoza, stepen obrade i finalizacije je mali; odnos uvoza i izvoza je 3:1; nema velikih proizvođača u proizvodnji koji bi pojeftinili proizvod; usitnjene kompanije ne mogu konkurisati na evropskom tržištu; pojedini uvoznici istovremeno su i najveći izvoznici, kao npr. u tekstilnoj industriji.

U raspravi su učestvovali: Jerko Ivanković Lijanović, Ekrem Ajanović, Jozo Križanović, Slavko Jovičić, Hadži Jovan Mitrović, Salko Sokolović, Mehmed Suljkanović i Snježana Rajilić.

S obzirom da je trgovinski deficit u prva tri mjeseca 2008. godine dostigao iznos od 2,105 milijardi KM i povećan je za 38,67% u odnosu na isti period u 2007. godini, konstatirano je da bi trebalo osmisliti podsticaje za poljoprivrednu proizvodnju.

Izlaganje predstavnika Ministarstva vanjske trgovine i ekonomskih odnosa BiH je ohrabrujuće, ako se uzme u obzir složeni sistem Bosne i Hercegovine. Zaključeno je da je zabrinjavajuće što se izvoz robe svodi samo na desetak država, te da je neophodno učiniti nešto na njegovom proširenju. Vanjskotrgovinska komora trebalo bi da promovira određena preduzeća.

Također, konstatirano je da Informacija o robnoj razmjeni Bosne i Hercegovine za prvi kvartal 2008. godine sadrži mnogo podataka. Postavlja se pitanje koliko je prvi kvartal pouzdan pokazatelj za cijelu 2008. godinu.

Mediji bi trebalo da posvete više pažnje ovoj temi. Ni na državnom ni na entitetskom nivou ne radi se mnogo na rješavanju ovih problema. Direktni proizvođači su nezadovoljni. U privredi je situacija takva da, umjesto da se otvaraju nova radna mjesta, ljudi se otpuštaju s posla.

Potrebno je naći mogućnost da se na državnom nivou učini nešto afirmativno te imati ekonomsko-privrednu diplomatiju.

Udruženje poljoprivrednika u BiH, kao nevladina organizacija, ponudilo je pomoć Komisiji za vanjsku trgovinu i carine kada je u pitanju prikaz stvarne situacije na tržištu Bosne i Hercegovine, a da se ne ulazi u nadležnosti Komisije.

Uz određene sugestije obrađivaču materijala za tehničku ispravku na str. 3. i 20. Informacije, koja je opravdana i prihvaćena od MVTEO, većina članova Komisije podržala je

Informaciju kao relativno dobar materijal, uz konstataciju da BiH ima poljoprivredne resurse i da se stimulacija poljoprivredne proizvodnje zajedničkim interesima treba crpiti iz budžeta entiteta, kantona i općina, a da se jačanjem institucionalnih kapaciteta, davanjem koncesija štiti domaća proizvodnja.

Članovi Komisije jednoglasno su primili k znanju Informaciju i usvojili sljedeće zaključke:

1. Zadužuje se Vijeće ministara BiH da koordinira rad institucija koje ocjenjuju usklađenost kvaliteta prerađenih proizvoda u oblasti poljoprivrede i industrije;
2. S obzirom na kretanja u BiH i okruženju, potrebno je povećati stimulacije za poljoprivrednu proizvodnju.

Ad. 3. Upoznavanje o dopisu Udruženja poljoprivrednika u Bosni i Hercegovini broj:01/3-50-3-587/08, od 14. 5.2008.

Razmatran je dopis Udruženja poljoprivrednika u BiH koji smatraju da je došlo do tehničke greške u trgovinskom dijelu Sporazuma o stabilizaciji i pridruživanju s Evropskom unijom, tj. da je **zamijenjen tarifni broj 0203 22 11 00 sa tarifnim brojem 0210 11 31 00.**

U ODLUCI O USKLAĐIVANJU CARINSKE TARIFE BiH („Službeni glasnik BiH“, br. 7/08) koja se primjenjuje od 1. januara 2008. sadržani su navedeni tarifni brojevi, uz konstataciju da nije napravljena tehnička greška.

u Poglavlju 2 - MESO I JESTIVI KLAONIČKI PROIZVODI pod tarifnom oznakom **0203** sadržani su: **Svinjsko meso svježe, rashlađeno ili smrznuto;**

- tarifna oznaka 0203 22 11 00 obuhvata smrznute butove i komade od domaćih svinja (stopa carine 10% +2,40 KM/kg);

- pod tarifnom oznakom **0210** sadržani su: **Meso i jestivi mesni klaonički proizvodi, soljeni u salamuri, sušeni ili dimljeni; jestivo brašno i prah od mesa ili od klaoničkih proizvoda;**

- tarifna oznaka 0210 11 31 00 obuhvata sušeno ili dimljeno meso, butove i komade s kostima od domaćih svinja (stopa carine 10% + 2,50 KM/kg).

Jerko Ivanković Lijanović predložio je da se Ministarstvu vanjske trgovine i ekonomskih odnosa BiH uputi sljedeći zaključak:

„ Pošto u ovom trenutku nije moguće ispuniti zahtjev Udruženja poljoprivrednika u BiH, zadužuje se Ministarstvo vanjske trgovine i ekonomskih odnosa BiH da, prilikom izmjena i dopuna Zakona o carinskoj tarifi BiH, uvrsti u carinske kvote u sklopu carinske tarife BiH tarifni broj iz dopisa Udruženja poljoprivrednika u BiH 0210 11 31 00.“

Ad.4. Tekuća pitanja

U okviru ove tačke dnevnog reda, članovi Komisije usvojili su sljedeće zaključke:

1. Prima se k znanju Mišljenje Direkcije za evropske integracije o usklađenosti Prijedloga zakona o zaštiti domaće proizvodnje u okviru Sporazuma CEFTA s odredbama pravne tečevine EU (*acquis communautaire*).
2. Dogovorene su pojedinosti u vezi s realizacijom posjete zemljama potpisnicama Sporazuma CEFTA-e.

Sjednica je završena u 15,40 sati.